

1922

ԽԱՔԱՆԻ

ՔԱՌՅԱԿՆԵՐ

1

Անցա՝ քարը սըրտիս վրա՝ ջրրի պես.
Մենակ տատասկ ու փուշ տարա՝ ջրրի պես.
Իմ աշխարհքում հանգիստ չառա՝ ջրրի պես,
Ու գընացի, ետ չըդառա՝ ջրրի պես:

2

Ծուխըդ կելնի պատուհանից երբեւէ.
Հավքըդ կերթա իրեն բընից երբեւէ.
Թեկուզ մի դար ապրես սըրտով մըտերմիդ,
Չարի սըրտով կելնես տանից երբեւէ:

3

Ասում են՝ թե հազար տարին մի անգամ
Մի փըրկիչ է աշխարհ գալիս,— մի պատգամ.
Մին, երբ եկավ, ծընված չէինք մենք մորից,
Մին էլ, երբ գա, մեռած կըլնենք ցավերից:

Ե՛կ, Խաքանի, ու հեռացիր էս շարության զընդանից,
 Շեն ու շենսիրտ, անցի՛ր, գնա ցավ ու հոգսի էս տանից.
 Կյանք ես առել երկընթիցը, դա շըղթա է դառել քեզ,
 Ետ տուր իրեն տրված կյանքը, թըռիր ազատ ամենից:

Նա որ գընաց՝ սիրտս էլ գընաց ու ետ չեկավ իր մոտից,
 Աչքըս ճամփին ու ականջըս միշտ դըռանն է կարոտից.
 Աչքս է դառնում մին ականջիս, թե լուր չունե՞ս էն օրից,
 Մին ականջս է դիմում աչքիս, թե չե՞ս տեսել դու նորից...

Հոգուդ հավքը հանկարծ թըռավ՝ ի՞նչ ես դու.
 Ճամփիդ կիսում ձիդ որ կորավ՝ ի՞նչ ես դու.
 Եթե մարդ ես — կյանքը փոխ է տրված քեզ,
 Փոխ տրվողը որ ետ տարավ՝ ի՞նչ ես դու: